

AUGLÝSING

um staðfestingu á verklagsreglum Bændasamtaka Íslands um úthlutun bústofnskaupastyrkja til frumbýlinga.

Með vísan til gr. 6.3 í samningi um starfsskilyrði sauðfjárræktar frá 25. janúar 2007, ásamt síðari breytingum og 37. gr. laga um framleiðslu, verðlagningu og sölu á búvörum nr. 99/1993, með áorðnum breytingum, hefur sjávarútvegs- og landbúnaðarráðherra staðfest verklagsreglur Bændasamtaka Íslands um úthlutun bústofnskaupastyrkja til frumbýlinga. Verklagsreglurnar eru birtar sem fylgiskjal með auglýsingu þessari. Með þessari auglýsingu falla brott eldri verklagsreglur um úthlutun bústofnskaupastyrkja til frumbýlinga sem birtar voru í B-deild Stjórnartíðinda með auglýsingu nr. 930/2010.

Atvinnuvega- og nýsköpunarráðuneytinu, 21. janúar 2014.

F. h. sjávarútvegs- og landbúnaðarráðherra,

Ólafur Friðriksson.

Rebekka Hilmarsdóttir.

Fylgiskjal.

VERKLAGSREGLUR um úthlutun bústofnskaupastyrkja til frumbýlinga.

1. gr.

Samkvæmt samningi um starfsskilyrði sauðfjárræktar frá 25. janúar 2007, með síðari breytingum, skal árlega verja fjármunum til nýliðunar í stétt sauðfjárbænda, í formi styrkja til bústofnskaupa, bæði til frumbýlinga og við ætliðaskipti á bújörðum. Fjármunirnir eru hluti af liðnum „Nýliðunar- og átaksverkefni“ í samningnum og miðast við 43,75% af fjárhæð hans eins og hún er hverju sinni.

Framlög in beinast að einstaklingum, þannig getur sami aðili aðeins notið framlags einu sinni, í eigin nafni eða til lögaðila sem hann á að meirihluta og rekur. Þó er heimilt að skipta framlaginu á allt að fimm ár í röð ef bústofnskaup fara fram á þeim tíma og/eða skilyrði 4. gr. eru uppfyllt. Hjón og sambýlisfólk teljast einn einstaklingur í skilningi þessara reglna.

Markmið bústofnskaupastyrkja eru m.a. að stuðla að nýliðun í hópi sauðfjárbænda, styrkja búsetu í dreifbýli og efla sauðfjárrækt sem atvinnugrein.

2. gr.

Framlög eru veitt til nýliða í sauðfjárbúskap. Þeir einstaklingar sem eitt eða fleiri neðangreindra skilyrða gilda um teljast ekki til nýliða. Skilyrðin í liðum a, b og c miðast við tímabil átta ár aftur í tímann talið frá 1. janúar árið áður en umsókn er lögð fram í fyrsta sinn:

- Verið skráðir handhafar beingreiðslna.
- Verið eigendur að félagsbúum, einkahlutafélögum eða öðru fyrirtækjaformi sem rekið hefur sauðfjárbú.
- Hafa átt fleiri en 50 fjár samkvæmt forðagæsluskýrslum.

3. gr.

Framlög eru veitt til bústofnskaupa og miðast við kaup á sauðfé umfram 50 fjár. Umsókn um framlag skal skila inn til Bændasamtaka Íslands fyrir 1. mars ár hvert, eftir auglýsingu þar um. Bændasamtökunum er heimilt að auglýsa á sambærilegan hátt eftir umsóknum allt að tvisvar í viðbót ár hvert. Með umsókn skal framvísa gögnum sem sýna fram á að kaup á bústofni hafi sannanlega átt

sér stað. Viðmiðunarupphæð framlags er 5.000 kr. á kind, en framlag má þó aldrei verða hærra en kaupverð. Heimilt er að hækka framlag á kind, ef fjárhæðin sem til ráðstöfunar er, gengur ekki út.

4. gr.

Þeir sem fengið hafa úthlutað styrk skv. 3. gr. og sækja um aftur skv. 1. gr. geta sótt um sambærilegan styrk vegna fjölgunar í eigin bústofni. Eingöngu er þá heimilt að veita styrk út á þá fjölgun vetrarfóðraðra kinda sem umsækjandi sýnir fram á að hafi orðið vegna ásetnings úr eigin fjárstofni.

5. gr.

Bændasamtök Íslands annast afgreiðslu umsókna og stjórn samtakanna tekur ákvörðun um úthlutun framlaga. Fullnægi umsókn öllum skilyrðum skal fyrst úthluta fullum framlögum til kaupa á fyrstu 500 kindunum skv. hverri umsókn. Ekki er þó greitt framlag vegna fyrstu 50 kindanna í hverjum kaupum, nema þegar framlaginu er skipt skv. 1. gr. Að því loknu skal úthluta sömu framlögum til kaupa á kindum umfram 500, eftir því sem fjárveitingar leyfa.

Bændasamtökum Íslands er heimilt að afla upplýsinga um umsækjanda úr afurðakerfi, skrár yfir greiðslumarkshafa og aðild að gæðastýringu. Þá er Bændasamtökunum einnig heimilt að kalla eftir upplýsingum um aðild að framleiðslu sauðfjárafurða frá afurðastöðvum að fengnu samþykki umsækjanda. Þá er Bændasamtökunum heimilt að krefja umsækjanda um önnur þau gögn sem talin eru nauðsynleg vegna afgreiðslu umsóknarinnar. Heimild Bændasamtakanna til þess að afla gagna gildir út samningstímann, sbr. 6. gr.

6. gr.

Gerður verður samningur til fimm ára um nýliðunarframlag. Þar skal koma fram að framlagið fyrnist á fimm árum. Láti handhafi að framlagi af búskap og/eða uppfyllir ekki lengur skilyrði, sbr. 7. gr. á samningstímanum skal semja um hlutfallsleg skil á eftirstöðvum.

7. gr.

Áður en framlag kemur til greiðslu skal umsækjandi sýna fram á að hann eigi eða leigi rekstur á lögbyli og eigi lögheimili þar. Jafnframt skal umsækjandi leggja fram gögn um að hann hafi ÍSAT númer í búnaðargjaldsskyldri búgrein, virðisaukaskattsnúmer sem og gögn um að hann sé aðili að eða hafi sótt um aðild að gæðastýringu í sauðfjárrækt. Stjórn Bændasamtaka Íslands er heimilt að víkja frá skilyrði um lögheimili ef sérstakar ástæður mæla með því.

8. gr.

Komi í ljós að fjárveitingar dugi ekki til að veita full framlög til allra sem á þeim eiga rétt skv. reglum þessum skal fyrst skerða hlutfallslega framlög til kaupa á kindum umfram 500, sbr. 4. gr. Nægi það ekki skal skerða önnur framlög á sama hátt. Ef ekki tekst að úthluta öllu því fjármagni sem er til ráðstöfunar, er heimilt að bæta upp skerðingar, sbr. 1. mgr., allt að tvö ár aftur í tímann.

9. gr.

Þeir sem uppfylla skilyrði reglna þessara geta sótt um framlag skv. þeim vegna bústofnskaupa sem fram hafa farið allt aftur til 1. janúar árinu áður en umsókn er lögð fram. Jafnframt geta þeir sem fengið hafa styrki allt að fjórum sinnum áður, sótt um viðbótarframlag skv. 1. og 4. gr.

10. gr.

Verklagsreglur þessar eru settar samkvæmt grein 6.3 í samningi um starfsskilyrði sauðfjárræktar frá 25. janúar 2007 með síðari breytingum. Reglurnar öðlast gildi að fenginni staðfestingu sjávarútvegs- og landbúnaðarráðherra og gildistími þeirra er sá sami og samningsins. Almenn ákvæði samningsins gilda um þá fjármuni sem ráðstafað er samkvæmt reglunum, eftir því sem við á.

Með þessum reglum falla brott eldri verklagsreglur Bændasamtaka Íslands um úthlutun bústofnskaupastyrkja til frumbýlinga sem birtar voru í B-deild Stjórnartíðinda með auglýsingu nr. 930/2010.

Reykjavík, 17. janúar 2014.

F.h. Bændasamtaka Íslands,

Eiríkur Blöndal.

B-deild – Útgáfud.: 22. janúar 2014